

Evening Dogri News Bulletin, 10 July 2024

इवनिंग डोगरी न्यूज़ बुलेटिन

समे-18:15 Hrs

Headlines

- प्रधानमंत्री नरेंद्र मोदी होंरें वियेना च आस्ट्रिया दे चांसलर कार्ल नेहम्मर हुंदे कन्नै गल्लबात कीती। इस दौरान दपक्खी रिशतें दे बक्ख-बक्ख आयामें पर चर्चा होई।
- सुप्रीम कोर्ट नै आखेआ जे दंड प्रक्रिया संहिता दी दफा-125 दे तैहत इक मुस्लिम महिला गी अपने घर आले सोयां गुजारा भत्ता हासिल कने दा अधिकार ऐ।
- उत्तरी कमान प्रमुख लेफ्टिनेंट जनरल एम.वी सुचेन्द्रा कुमार होंरें लद्दाख च असल कब्जा रेखा कन्नै लगदे अगेत्रे लाहकें दा दौरा लाया ते बलें गी भविक्ख दिएं चुनौतिएं कन्नै निब्बडने लेई त्यार रौहने लेई आखेआ।
- सेहत ते मेडिकल शिक्षा सरबंधी मैहकमे दे सचिव डॉ. सेयद अबिद रशीद शह होंरें जम्मू कश्मीर च सारे सरकारी मेडिकल कालजें च इमरजेंसी मेडिसिन सरबंधी मैहकमा कायम करने दे कम्मकाज दा जायजा लैता।

<><><><><><>

PM-Austria Visit

प्रधानमंत्री नरेंद्र मोदी हुंदा अज्ज आस्ट्रिया दे वियेना च ओपचारिक सुआगत कीता गेआ। आस्ट्रिया दे चांसलर कार्ल नेहम्मर बी श्री मोदी हुंदे कन्नै हे। प्रधानमंत्री मोदी होंर दऊं राश्ट्रें दी जात्तरा दे दुए चरण च कल मास्को थमां वियेना पुज्जे हे। प्रधानमंत्री नरेंद्र मोदी होंरें वियेना च आस्ट्रिया दे चांसलर कार्ल नेहम्मर हुंदे नै गल्लबात कीती ते बक्ख-बक्खर दपक्खी आयामें बारै चर्चा कीती। प्रधानमंत्री नरेंद्र मोदी ते आस्ट्रिया दे चांसलर कार्ल नेहम्मर होंरें सांझे तौरा पर वियेना दे हाफबर्ग मैहल च इक गोलमेज बपार बैठका च भारतीय ते आस्ट्रिया दे बपार जगत कन्नै सरबन्धित मशहूर सीईओ-एं गी संबोधित कीता। श्री मोदी होंरें भारतीय ते आस्ट्रिया दिएं कंपनिएं बश्कार सहयोग लेई खासा संभावनाएं उप्पर लो पाई इंदे च बुनिया ढांचा, परतिय इस्तेमाल होने आहली उर्जा, हरित क्षेत्र, नमीं ते उभरदी टेक्नोलाजी, फिनटेक, स्टार्ट अप्स ते नमियां काड्डां शामिल ना। उनें आस्ट्रिया दिएं कंपनिएं गी भारत च निवेश दा बी साहा दित्ता। बैठक दे मगरा इक प्रेस बयान च मोदी होंरें आखेआ ऐ जे उनें पेश आवारदी चुनौतिएं बारै बी गल्लबात कीती जिंदे च जलवायु बदलाव ते आतंकवाद शामिल ऐ।

<><><><><><>

SC-Muslim

सुप्रीम कोर्ट नै आखेआ ऐ जे दंड प्रक्रिया संहिता दी दफा-125 तैहत इक मुस्लिम महिला गी अपने घर आले सोयां गुजारा भत्ता पाने दा अधिकार ऐ। न्यायधीश बी.वी नागरत्ता ते आगस्टीन जार्ज मसीह हुंदी इक पीठ नै इस मामले च दायर याचिका गी खारिज करी दित्ता जेदे च इक व्यक्ति नै दफा 125 CRPC तैहत अपनी तलाकशुदा पत्नी गी गुजारा भत्ता देने सरबन्धी निर्देश खलाफ याचिका दायर कीती ही। पीठ नै एहू बी आदेश दित्ता जे आवेदन लम्बित रौहनेदौरान जेकर महिला गी तलाक दित्ता जंदा ऐ तां ओहू ब्याह अधिकारी संरक्षण सरबन्धी 2019 दे अधिनियम दा सहारा लेई सकदी ऐ। पीठ आखेआ ऐ जे 2019 दे अधिनियम तैहत उपा CRPC दी दफा 125 तैहत उपा दे अलावा ऐ। सर्वोच्च अदालतै साफ कीता ऐ जे गुजारा भत्ता मंगने दा कनून सब्बनें महिलाएं आस्तै वैद्य होग ना की छडा शादीशुदा महिलाएं आस्तै।

<><><><><><>

CS-Tourism

मुख्य सचिव अटल डुल्लू होंरें कल सैलसफा मैहकमे दे प्रस्ताव दा आंकलन करने आस्तै इक बैठका दी अध्यक्षता कीती जेदे च सैलसफा केंद्री मंत्रालय सैलसफा आस्तै फंड विश्व बैंक थमां हासल करोग। बैठक दौरान मुख्य सचिव होंरें अगले चऊं-पंजें बरें दी अवधि दौरान सैलसफा मंत्रालय ते विश्व बैंक दी फंडिंग लेई मैहकमे आस्सेआ तैयार कीते गेदे प्रस्ताव दा जायजा लैता। इस बैठक दौरान सैलसफा मैहकमे दी कमिशनर सैकरेटरी यशा मुदगल होंरें बी इस प्रस्ताव दी मुख्य खासियतें पर लोहू पाई। उनें मेडिकल सुविधा, साफ-सफाई, बुनियादी ढांचे ते होंरें सुविधाएं पर बी ध्यान देने लेई आखेआ। इस प्रस्ताव च पैरा ग्लाइडिंग, जिपलाइन, कैंपिंग, स्किंग, ट्रेकिंग, राफ्टिंग जनेही गतिविधियें गी शुरू करने दे दायरे गी शामिल कीता गेआ ऐ।

<><><><><><>

Div Com Raghunath Bazar

जम्मू दे डिविजनल कमिशनर रमेश कुमार होरें कल रघुनाथ बजा दा दौरा लाया ते उत्थें चला रदे विकास कम्में दी स्थिति दा जायजा लैता। डिविजनल कमिशनर होरें गी सब्बनें कम्में दी जानकारी दिती गई जिंदे च फुटपाथ, नाली, प्रवेशद्वार ते शिडकें दे कम्म शामिल ना। रघुनाथ बाजार एसोसिएशन दे नुमाइंदें मशहूर बाजार च होआ'रदे इनें विकास कम्में लेई संदोख जताया ऐ। रमेश कुमार होरें रघुनाथ मंदर दे कन्नै-कन्नै दकानें दे सामने आहले हिस्से च बी इक शैल रूप देने दा सुझा दित्ता ऐ तां जे इत्थें औने आहले सैलानियें गी शैल दृश्य दिक्खने गी लब्बै ते उनेंगी साफ-सुथरा माहौल उपलब्ध करोआया जा। डिविजनल कमिशनर होरें रघुनाथ बाजार एसोसिएशन दे अध्यक्ष गी आखेआ जे ओह जम्मू दे स्मार्ट सिटी परिषद लिमिटेड दे सीईओ कन्नै दुकानें दे साइड बोर्डें लेई योजना पर कम्म करन। बाजार च जारी कम्में दा मुआयना करदे होई रमेश कुमार होरें कम्में गी तौलें शा तौलें पूरा करने दे निर्देश दित्ते ना।

<><><><><><>

BIMSTEC-BFAR

बंगाल दी खाड़ी बहु क्षेत्रीय तकनीकी ते आर्थिक सहयोग, पैहल यानि (बिस्टेक) दे विदेश मंत्रियें दा दुआ सम्मेलन कल नमीं दिल्ली च शुरू होगा। विदेश मंत्रालय नै दस्सेया ऐ जे विदेश मंत्री डॉक्टर एस. जयशंकर होर इस कार्यक्रम च बिमस्टेक दे विदेश मंत्रियें दी मेजबानी करंगन। मंत्रालय नै दस्सेया ऐ जे एह सम्मेलन बंगाल दी खाड़ी ते तटीय खेत्तरें च सुरक्षा, संपर्क, बपार ते निवेश दे खेत्तरें समेत मते सारें सारे खेत्तरें च सहयोग गी बढ़ावा देने आस्तै इनें सदस्यें गी इक मौका हासल करोआडन। बिमस्टेक विदेश मंत्रियें दा पैहला सम्मेलन पिच्छले बरे जुलाई म्हीनें च थाईलैंड दे बैंकाक च होआ हा। बिमस्टेक बहुआयामी सहयोग आस्तै सत्त दक्खन ते दक्खन पूर्व एशियाई देशै दा समूह ऐ।

<><><><><><>

Plantation Drive-Reasi

जम्मू-कश्मीर केंद्र शासित प्रदेश प्रशासन दे दिशा-निर्देशें मुजब अज्ज रियासी जिले दे सब्बनें सरकारी स्कूलें च बूहटे लाने सरबन्धी अभियान शुरू कीता गेआ। इस अभियान तैहत जंगलात मैहकम, शिक्षा विभागें कन्नै रलियै 1 जहार 98 सरकारी स्कूलें च इक लक्ख शां मते बक्ख-बक्ख किस्में दे बूहटे लाडन। इस अभियान दी शुरूआत अज्ज रियासी दे डिप्टी कमिशनर विशेष महाजन होरें कीता। उनें आखेआ।

<><><><><><>

Army Comander Challenges

उत्तरीकमान प्रमुख लेफ्टिनेंट जनरल एम.वी सुचेन्द्रा कुमार होरें रेखा कन्नै लगदे अगेत्रे लाहकें दा दौरा लाया ते बलें गी भविक्ख सरबन्धी चुनौतिएं लेई तयार रौहने लेई आखेआ। उत्तरी कमान प्रमुख होरें कारगिल युद्ध स्मार्क दा दौरा लाया ते ऑपरेशन विजय दौरान शहीद सैनिकें गी श्रद्धांजलि भेंट कीती। इस मौके फायर एंड फ्यूरी कोर दे जीओसी बी मौजूद हे। दौरे दौरान कम्म कारवाइएं ते सुरक्षा सरबन्धी तयारिएं दा जायजा लैता गेआ। उत्तरी कमान प्रमुख होरें बलें आस्सेआ उच्चे मानकें गी बनाई रखने ते पेशेवराना रौं अपनाने लेई उंदी सराहना कीती। उनें सुरक्षा कर्मिएं गी भविक्ख दिएं चुनौतिएं कन्नै निब्वडने लेई पूरी चाल्ली तैयार रौहने लेई आखेआ।

<><><><><><>

Samba-Security

कठुआ जिले दे बदनोत लाहके च आतंकवादी हमले दे मद्देनजर साम्बा जिले च सुरक्षा बंदोबस्त होर निगार करी दित्ते गए ना। एसओजी आस्सेआ बन्ने आले लाहकें च तपाशी अभियान चलाया गेआ ऐ। इस अभियान दी अगुवाई डी.एस.पी. ऑपरेशन जी.आर भारद्वाज होरें कीती। इस दौरान सैनिकें लाहके दे हर थाहर तपाशी अभियान चलाया। साम्बा थवां जिला संवाददाता सतपाल शर्मा कन्नै गल्ल करदे होई डीएसपी ऑपरेशन होरें आखेआ।

<><><><><><>

H&ME-GMC

सेहत ते मेडिकल शिक्षा मैहकमे दे सचिव डॉ. सैयद अबिद रशीद शाह होरें जम्मू-कश्मीर दे सारे सरकारी मेडिकल कॉलजें च आपाति स्थिति लेई इमरजेंसी मेडिसिन सरबंधी मैहकमें गी कायम करने सरबंधी कम्मै दा जायजा लैता। इस बारै श्रीनगर दे सिविल सचिवालय च इक बैठक लग्गी जेदे च मैहकमे दे वरिष्ठ अधिकारी बी मौजूद हे। उनें सरकारी मेडिकल कालजें दे प्रिंसीपलें ते होरनें सरबंधी अमले थवां सुझा मंग्गे तां जे सारे सरकारी मेडिकल कालजें च फास्ट ट्रैक दे आधार पर 30 बिस्तरें दी समर्थ आला एहू मैहकमा कायम कीता जाई सकै। सारे लोडमंद लोकें गी म्यारी सेहत सुविधा उपलब्ध करोआने आले नजरिए गी उजागर करदे होई सचिव होरें इस पूरी प्रक्रिया गी तौले नबेडने लेई आखेआ। उनें मौजूदा ढांचे, अमले दा बेहतर ढंगै सिर इस्तेमाल करने पर जोर पाया। उनें मैहकमे गी तौलें थवां तौले कम्मकाज करने जोग बनाने लेई लोडचदी खुशखरीद करने लेई बी आखेआ। सारे मेडिकल कालजें च डिपार्टमेंट ऑफ इमरजेंसी मेडिसिन कायम करना राश्ट्रीय मेडिकल आयोग दे नियम कायदें स्हाबै लाजमी ऐ।

<><><><><><>

NDMA

आपदा प्रबंधन सरबंधी राश्ट्रीय प्राधिकरण ने अनंतनाग जिले च इक बैठक लाइए चला'रदी श्री अमरनाथ जी दी जात्तरा दे सरबंधे च तैयारिएं दा जायजा लैता। एन.डी.एम.ए दे वरिष्ठ सलाहकार मेजर जनरल रटैर अजय कुमार वर्मा होरें इक बैठक दी अध्यक्षता कीती। एहूदे च जिला प्रशासन, सरबंधी मैहकमें ते सरबंधी धडें हिस्सा लैता। मुख्ब करी ध्यान जात्तरा दौरान कुसै बी आपदा आली स्थिति कन्नै निब्वडने पर दिता गोआ। जिला प्रशासन ते सरबंधी एजेंसियां अमला ते उपकरण सरबंधी मदद उपलब्ध करोआ'रदियां ना। इस दौरान एहू जानकारी दिती गेई जे लोडचदे उपकरण उपलब्ध न जेदे राएं यात्रुएं दी सुरक्षा यकीनी बनी सकदी ऐ। अजय कुमार होरें टेक्नोलाजी दे इस्तेमाल, आपसी तालमेल पर जोर पाया।

<><><><><><>

CBSE-Clarification

केंद्री माध्यमिक शिक्षा बोर्ड सी.बी.एस.ई नै साफ कीता ऐ जे मौजूदा पाठ्य पुस्तकें च बदलाव छडा त्री ते 6मीं जमात लेई कीता गोआ ऐ, होरनें जमातें आस्टै नेई। स्कूलें गी निर्देश दिता गोआ ऐ जे ओहू त्री ते 6मीं जमात गी छोडिए होरनें जमातें आस्टै उनें कताबें दा इस्तेमाल जारी रक्खन जियां उनें पिच्छले शैक्षणिक बरे च कीता हा।

<><><><><><>

IMD-Weather

भारती मौसम विभाग नै अगले 2 शा 3 दिनें दरान पूर्वोत्तर ते कन्नै लगदे पूर्वी भारत दे हिस्सें च भारी थमां बडी भारी बरखा दी पेशगोई कीती ऐ। मौसम विभाग नै आखेआ ऐ जे नेयी स्थिति उप हिमालयायी पच्छिम बंगाल, अरूणाचल प्रदेश ते सिक्किम च कल्लै तोहडी जिसले के असम, मेघालय, ओडिशा, नागालैंड, मणिपुर, मिजोरम ते त्रिपुरा च इस महीने दी 13 तरीक तगर बनी दी रौहगा। नेय गै हालात अगले 4 दिनें दरान गोवा, मध्य महाराश्ट्र, कर्नाटक, गुजरात ते केरल च बी बने दे रौहने दे असार ना। तोआई उत्तर ते मध्य भारत च मध्य प्रदेश, पूर्वी उत्तर प्रदेश, उत्तराखंड, हिमालय प्रदेश, पच्छमी उत्तर प्रदेश, जम्मू, हरियाणा ते पंजाब च बी अगले 2 शा 3 दिनें दरान बडी भारी बरखा दी पेशगोई कीती गेदी ऐ। स्हाढे आकाशवाणी दे संवाददाता कन्नै गल्ल करदे होई मौसम विभाग दे वैज्ञानिक सोमा सेन रॉय होरें दस्सेया ऐ जे मौसम च ममूली बदलाव करी आने आहले दिनें च बिहार दे किश हिस्सें उप्पर मती भारी बरखा दी स्थिति घट्ट होई जाग।

<><><><><><>